

[Augsburg], 25. März 1579

An Tycho Brahe

Abschrift: ÖNB Wien, Cod. 10686<sup>66</sup>, fol. 69r-70r.Druck: Brahe, *Epistolae S. 47f.; Brahe, Opera omnia, Bd. 7, S. 51f.*Regest: Keil/Zäh, *Aufenthalt S. 92; Keil/Zäh, Beziehungen S. 188.*

## HIERONYMUS WOLFIUS AD TYCHONEM BRAHE. S.

EADEM Tabellarij fortuna, TYCHO nobilissime, amice colende, hīc sumus usi, qua tua praestantia. Nam Aurifaber ille, qui tuas reddiderat, hinc abijt. Quis literulas sit perlaturus, nescio, sed sub vesperam demum mihi nunciatum est, ut rescriberem. Itaque cogor esse brevior et ob temporis brevitatem et propter diem festum. Absentibus WILLERI ministris non possum parare libellos nostrorum, qui de atrocissimo illo Cometa, quem unquam vidi, scripserunt. Et sane puto nec Tabellarium grandiusculos libellos perlaturum et quae tu elaborāris, propediem nos accepturos. Quae autem de amplitudine vestrae regionis et fortudine gentis scribis, satis nota nobis sunt, et Cimbros, Ambrones et Teutones a Martha C. MARIJ maga potius, quam a Romanis esse victos arbitramur. Linguam vero vestram ijs ornavit et antiquitatis et proprietatis et copiae laudibus IO. GOROPIUS, ut eam vel Hebraeae anteponat, nedum Latinae et Graecae. Itaque si hīc essemus, Cimbrice a te disceremus. Sed fortasse nobis aetas obstaret, quo minus essemus dociles. Nam mortuo adhibere medicinam, et docere senem idem esse Graeco proverbio dicitur. Me quidem senectus et pigrum et obliviousum facit, et multipliciter tam corpus quam animum affligit. Quomodo autem me contra eam, tanquam morbum incurabilem muniam, non video, praesertim deficiente hīc vino bono et incorrupto, quo solo tanquam antidoto moderate sumto uti soleo contra tam invictum hostem, uti scis meum morem. Quare sive me hīc enneaticus climacter, ὁ ἀνδροδάμας, sustulerit, sive 66<sup>to</sup> tollendum reliquerit: susque deque fero, modo CHRISTUS Servator in Palatio sui patris parvulam aliquam cellulam assignet, in qua beate et aeternum requiescam, quod ita fore clementia divina fretus confido.

Respublica nostra in eo statu adhuc est, quem hinc discedens reliquisti. HAINZELIUS filius nuper a me uxoris suae Genesin confici voluit, cum ego respondi, D. TYCHONEM id in melius praestare posse, si vellet. Sed sane dubito, an velles, cum hīc in talibus difficilimus fueris. Isti homines affectibus suis indulgentes, succensen Astrologis et vera et falsa dicentibus. Itaque Tiresias soli Apollini vaticinandum esse dixit apud SOPHOCLEM, qui hominis indignationem, quippe Deus negligat. Eclipsin Solis in Η hīc vidimus pene integrum, in qua et CYPRIANUS, sed minus tamen quam COPERNICUS aberravit. Cuius Ephemeridas MICHAEL MAESTLINUS instrumentis coelo uti opinor adhibitis ab anno 1577 usque ad annum 1588 correctiores se esse editurum mihi pollicetur, nisi Typographus in mora sibi sit. Sed iam manum de tabula. Nam advesperascit et rhabarbarum scriptionem meam interpellat, quo uti saepius contra Ischiadem et Chiragram cogor. Tuam vero Excellentiam et valere et florere omni bonorum genere ex animo et spero et opto. Vale. 25. Martij Anno 1579.